

Cera conoci cu e cocolishi Conaspella Wendrosi y e cocolishi Arubaconus hieroglyphus

DNM a comparti cu nos informacion util y interesante tocante dos tipo di cocolishi, es Conaspella Wendrosi y Arubaconus hieroglyphus. Ambos ta molusco gastropodo di e famia Conidae, pero cada un tin su propio cualidadnan y aspectonan unico.

Cocolishi Wendrosi

Esorto di molusco gastropodo marino aki di e famia Conidae su number cientifico ta Conaspella wendrosi. Na Papiamento nos ta generalisa uzo di e palabra cocolishi pa e especienan aki. Na Aruba, Conaspella wendrosi ta un di e tres especie endemico di cocolishi. E especie aki a hay'e den lama Caribe, te awo e unico lugha conoci tawata den area di Barcadera na costa di Aruba. E habitat ta den lama cu no ta hundo, den santo cu ta sinti poco lodo y cerca di matanan di mangel, no mas cu 30 centimeter di profundidad.

E lugha specifico aki no t'ey mas y investigadonan tin algun tempo cu no ta haya e sorto aki pa observa. Por bisa cu el a bay perdi.

E casca di e cocolishi aki tin un forma di un 'cone' y e largura ta rond di 14 milimeter. E patronchi riba e casca ta consisti di un composicion di rijnan di strepi cu ta zigzag y punta punta. E manchanan ta color bruin cu poco tono biña. E casca ta sinti liso, pero

Conaspella



na e spiral cu un punta, e ta mas grof.

Conaspella wendrosi ta un sorto di cocolishi di lama cu tin un bestia bibo paden cu ta un 'slak'. E ta un 'slak' venenoso. E por pica hende, p'esey mester anda cu cautela of no mishi cu ne mes. Su veneno, e ta hay'e for di su cuminda cu ta e bichi 'fire worm'. E cocolishi tin un puy largo cu e ta saca pa staca e bichi, asina e ta inyecta e veneno den e bichi pa e verdoof esaki pa e come.

E sorto di cocolishi C. wendrosi a pasa door di reclasificacion di su taxonomia na 2013, y di Conus wendrosi a bira Conaspella wendrosi. E number Perplexiconus wendrosi tambe ta uza p'e sorto. Hopi especie cu tawata den e genero di Conus a haya reclasificacion y ta refleha

den e registro mundial di especie marino (Worms) y otro organisacionan autorisa.

Nos antepasadonan a piki cocolishi como parti di nan experiencia den naturalesa y cana band'i lama. Otro nan a colecta esakinan pa hunga cu nan of pa pronkia. Pero awendia e sortonan protegi ta rekeri mas respet den nan maneho. Ta importante pa trece dilanti cu ta prohibi pa exporta cocolishi. Na frontera di Aruba tin control rigido y ta prohibi pa coy un specimen bibo of morto.

Arubaconus Hieroglyphus; un cocolishi di lama endemico

E cocolishi Conus hieroglyphus, ta un molusco gastropodo marino di e famia Conidae ta un di e tres cocolishi endemico di Aruba. E number cu investigadonan



local ta uza ta Arubaconus hieroglyphus pero e number aki no a haya aceptacion na nivel internacional ainda. Cu otro palabra, ta na Aruba so ta haya e especie aki.

E area na unda a haya nan ta na Arashi den awa di lama no mas hundo cu 4 of 6 meter. Nan habitat ta den santo blanco grof den cercania di baranca, coral morto of rifnan di coral. E casca di e cocolishi ta den forma spiral cu ta caba den un punta roos y ta sinti grof cu rijnan di liña. E color ta mustra manera manchanan preto, maron cu blanco. E adultonan por crece te cu 21 milimeter. E cocolishi aki tin un bestia bibo paden di e casca cu por yam'e un 'slak'.

Mescos cu tur otro especie di e genero Conus, e ta venenoso. Nan tin un saco den nan curpa cu veneno y

ora di come nan ta lansa algo manera un harpun largo y flexibel yama djente radular pa verdoof nan presa y come. E bestia ta detecta su presa via señal sensorial. E ta inyecta e presa cu e veneno pa e paralis'e. Despues di come e ta deshaci di loke a resta hunto cu e djente di harpun, y e ta crece un un djente nobo. Bestianan manera turtuga, secat, chucho, cangreu y kreeft ta come cocolishi.

Desaroyo den infraestructura di turismo ta afecta e poblacion y nan habitat. Otro menasa pa nan existencia ta e practica di 'dredging'. Tambe tin hende cu ta frecuente e area y ta coy nan, bay cu nan, y asina e bestia ta muri. Como cu e sorto ta asina chikito, hende ta exporta nan pa bende riba mercado internacional cu coleccionistanan di cocolishi.